

Lettre du Pere Millet a Quelques Missionnaires  
du Canada.

A ONNEIST Jour de L'Octaue  
de st. Pierre et de st. Paul 1691

**M**ES REUERENDS PERES  
Vous serez le m'asseur bien aises d'ap-  
prendre la maniere dont les Iroquois et  
surtout les Onneists ont conserué la vie depuis  
que je fus pris au fort de Frontenac jusqu'a present,  
vous aurez le Crois de la Consolation & les Gens de  
bien en beniront Dieu.

Je ne vous diray qu'un mot de la maniere que Je  
fus pris avec le Chirurgien St. Amand que l'auois  
mené avec moy a l'Instance des Onnontagues, pour  
seigner disoient ils quelques uns de leurs guerriers,  
pour nous mieux tromper Ils nous auoient fait  
entendre que leurs gens estoient allez a Montreal  
pour y faire des propositions de paix, Le Chirurgien  
fut pris a la Cabane des malades quil alloit pen-  
ser et moy a celle des anciens et des Capitaines, qui  
y estoient assemblez pour diuerses affaires sur les-  
quelles Ils me vouloient disoient ils consulter. Et  
pour faire prier Dieu un pretendu moribond, mais  
effectivement pour me faire prisonnier. L'on me  
demanda si les officiers & les Soldats ne sortoient  
point, Je repondis que non & qu'on m'envoyoit pour  
Sçauoir ce qu'ils souhaittoient de moy & des autres  
Vous payerez donc pour tous me dit on & aussitost